



KENYATAAN MEDIA

WUJUDKAN PERATURAN UNTUK BENDUNG PENYALAHGUNAAN VAPE

KUALA LUMPUR, 31 Mei 2021 – Larangan penggunaan dan penjualan produk vape bukanlah satu penyelesaian yang efektif bagi membendung penyalahgunaan vape di kalangan bawah umur.

Pertubuhan bukan kerajaan, Malaysian Vape Industri Advocacy (MVIA) berkata demikian bagi membidas sesetengah pihak yang menggesa kerajaan melarang penjualan dan penggunaan rokok elektronik atau vape sepenuhnya di negara ini.

Menurut **Rizani Zakaria, Presiden Malaysian Vape Industri Advocacy (MVIA)**, isu ini akan dapat dibendung sekiranya peraturan diperkenalkan.

“Isu utama pada masa ini adalah ketiadaan peraturan atau undang-undang khusus untuk mengawal industri vape supaya produk ini tidak jatuh ke dalam tangan mereka yang di bawah umur. Kalau kita lihat industri tembakau atau industri alkohol, terdapat peraturan yang dikeluarkan untuk melarang penggunaan dan penjualan kepada mereka yang di bawah umur. Dengan adanya peraturan, isu ini akan dapat dibendung.”

Tambahnya, sebarang cadangan larangan penggunaan atau penjualan produk vape juga tidak mengambil kira kepentingan industri yang bernilai RM2.27 bilion yang telah memberikan peluang pekerjaan kepada 15,000 pekerja di Malaysia dengan lebih daripada 3,000 perniagaan vape di negara ini.

“Cadangan larangan ini akan membantutkan perkembangan industri vape yang dijangka akan meningkat kepada RM10 bilion dalam masa beberapa tahun lagi. Secara tidak langsung, ia akan menyebabkan menjejaskan industri yang berpotensi menjana lebih banyak aktiviti ekonomi, peluang pekerjaan serta meningkatkan hasil kepada pendapatan negara.”

“Kita perlu mencontohi negara seperti UK dan juga New Zealand. Kedua negara ini telah terbukti berjaya dalam mengatasi pelbagai isu yang berkaitan vape termasuk membendung penyalahgunaan di kalangan mereka yang di bawah umur dengan mewujudkan peraturan yang komprehensif untuk industri vape. Malah ia turut membantu menurunkan kadar perokok konvensional (rokok tembakau) di negara mereka melalui kawal selia industri vape.”

“Public Health England (PHE) iaitu sebuah agensi kesihatan awam kerajaan yang utama di United Kingdom juga telah mengesahkan bahawa risiko kesihatan daripada penggunaan vape adalah 95% kurang mudarat berbanding rokok tradisional tembakau,” tambah Rizani.

Dalam pada itu, hasil dari tinjau selidik “Pandangan & Perspektif Rakyat Malaysia tentang Vape” yang dijalankan MVIA juga mendapati bahawa 88% daripada pengguna vape Malaysia yang dahulunya menghisap rokok kini telah berjaya berhenti merokok dengan bantuan vape.

Mengenai Malaysian Vape Industry Advocacy (MVIA)

MVIA ialah sebuah kumpulan kepentingan khusus yang tidak berlandaskan keuntungan dalam menyokong usahawan dan perniagaan vape Malaysia. Matlamatnya ialah untuk mewakili industri vape dengan menyampaikan suara industri kepada badan kerajaan, pihak berkuasa kawal selia, agensi penguatkuasaan dan pihak berkepentingan yang lain.